

Abuso laboral:

Trahador Hindu a haya cheque pa bay cobra na Merca

ORANJESTAD(AAN) E caso di e trahador Hindu cu a sali publica ayera den edicion di DIARIO, a lanta masha hopi stof mes na Aruba pasobra reaccionnan cu DIARIO a haya di tanto e comunidad Hindu como comunidad Arubano tabata hopi pica.

Arubianonan y integrantenan di comunidad Hindu, a critica fuertemente e forma di proceder di cierto compania Hindu na Aruba pa cu e forma con nan ta trata nan trahadornan.


Den e edicion di DIARIO di ayera, lectornan por a lesa bon cla con e abogado defensor di señor Lal a critica feurentemente den corte e hecho cu esnan di e compania Sipsons cu ta encarga cu e compania y cu no a respecta derechonan di e trahador Lala Motawani, cu nan mes no tin permit pa ta na Aruba.

Con por ta posibel cu autoridadnan na Aruba a bay riba instruccion di e encargadonan di e compania pa laga detene e trahador Lal y e encargadonan mes no tabata tin permit?

Unda imigracion a keda pa controla permit di esnan cu tabata pidi pa imigracion detene y deporta un di e trahadornan di Sipsons N.V.?

No ta por ta asina cu e trahador si ta worde persigui y e grandinan mes por haci y deshaci cu tanto ley como cu nan trahadornan y riba dje nan por dispone di imigracion ora cu aparentemente nan ta haya ta bon.

Redaccion di DIARIO a haya copia di e cheque cu e compania caminda cu Lal tabata traha y manera cu lectornan por mira awe, e trahador a haya su pago final despues di a traha añanan largo pa un limosna, awor e ta



haya 1361 dollar mericano pa loke e compania tabata debe Lal, pero e trahador mester bay cobra esaki te na Merca.

Ta di unda sali cu na Aruba un trahador ta haya un cheque y cu e mester bay busca su pago te na Merca?

Si mester conta e gastonan cu a trahador mester haci pa por bay te na Merca pa haya su placa anto ta cuanto placa ta resta pa e trahador manda pa su famia na su pais natal?

Kende ta garantiza e trahador cu ora cu e yega Merca cu e cheque cu el a haya na Aruba tin suficiente fondo pa e por haya su placa?

Kico ta para di e trahador si e bay te Merca y na Merca su cheque bons manera bala di basketball?

Kende ta garantiza e trahador cu e por dreña Merca pa por bay busca su placa na e banco na Miami.

Unda departamento di labor a keda den e caso aki y con por ta posibel cu tipo di actonan asina por worde cometi contra trahadornan na Aruba?

Si ta asina cos ta bay cu e compania Sipsons N.V. por hisa benta manera cu nan ta haya ta bon, anto mayan un trahador local cu bay traha pa e hendenan aki tambe por haya su mes ta bay busca su pago te na Miami.

Pueblo di Aruba kier sa den e caso aki unda ministro Marry Wever di Labor a keda y tambe unda ministro di Husticia a keda pa laga controla permitnan di esnan cu a

abusa di nan trahador y cu e hendenan aki si por sigui cana liber na Aruba manera cu nada a pasa y tur esaki cu bendicion di autoridadnan na Aruba.

Unda ministro Marry Wever, kende durante campaña a grita tanto cu e lo bay caba cu ilegalidad na Aruba a keda awor pa actua o pueblo mester bolbe bin tende cu e ministro no sa de ke se trata y cu e no por actua, bla bla bla?

E comunidad Hindu cu ta conoci como hendenan trahador a rabia pisa pa cu loke e compania Sipsons N.V. a haci cu a trahador Lal Motawani y nan tambe ta haya cu autoridadnan mester actua contra tipo di companianan asina cu ta bin Auba pa haci y deshaci y asina dañu pa tur esnan cu pa decadanan largo a traha duro y biba den bon harmonia cu e pueblo di Aruba.


Departamento di labor mester dreña den accion y exigi di e compania Sipsons cu nan ta paga e trahador na Aruba mes y nada di bay busca placa na un banco na Merca.

Fuera di esey Banco Central y LOT cu MOT y tur otro instancianan financiero na Aruba tin control riba sumanan di placa cu a bay pa e cuenta bancario na Merca?

Di unda cierto comerciantenan cu ta bin di exterior a haya placa pa paga sumanan miyonario pa cumpra edificionan y negoshinan na Aruba y e origen di e placanan aki a ser grescreen door di Banco Central y otro instancianan na Aruba pasobra Arubianonan mester pasa de tur sorto di reglamento prome cu nan por laga placa dreña y sali di Aruba, pero aparentemente esnan cu ta bin di exterior por cana kibra y cumpra loke nan ta haya ta bon?

Manera cu DIARIO a pone caba padilanti, e caso aki lo bay habri un beerput cu poco hende por a pensa cu esaki un dia lo sali na claridad di dia y pronto mas abuso y cosnan straño lo sali den publicidad pasobra algun trahador a cumenza basha abao anto mahos y aki aya tin hendenan local como strooman involvi tambe.

UNDA MARY WEVRO A KEDA!!



**TELEFONNAN
DI DIARIO
826747
FAX
828551**